

四庫全書

史部

欽定四庫全書

史部

平定準噶爾方略正編卷十二

詳校官監察御史臣孫家賢

通政使司副使臣莫瞻菴覆勘

總校官進士臣朱鈞

校對官編修臣周厚棟

謄錄監生臣

汪灝

欽定四庫全書

平定準噶爾方略正編卷十一

乾隆二十年夏四月己巳

命輝特貝勒齊木庫爾與副將軍阿睦爾撒納一同

進兵

上諭軍機大臣曰從前派貝勒齊木庫爾在屯田處

駐劄特因事勢尚在未定屯田地方不可無一幹

練之員防守彈壓特將齊木庫爾派往今大兵業

經進發一路情形深入無阻屯田事務易於辦理而齊木庫爾又在伊弟阿睦爾撒納前屢次陳請情願同往軍前効力即照阿睦爾撒納所請令齊木庫爾一同進兵其屯田事務即交與派出之台吉克伯克協同塔爾瑪善辦理

辛未

協辦陝甘總督劉統勳疏奏添設驛站馬匹事

宜

劉統勲奏言口外遞送文報軍臺地方空濶每
站設馬二十六匹如遇差使絡繹或馳驛人員
由塘行走即虞不敷並非口內州縣地方可產
民馬添補者比昨據將軍永常咨稱大兵於五
月內即可凱旋現在成功在即塘驛差使必多
口外各塘實有應須籌議之處查安提肅鎮兩
標俱有備戰餘馬若於此內每塘撥給馬一十
四匹於軍臺馳遞甚為有益原安塘站係由驛

撥馬即隨馬撥夫現在議增馬匹應即從各營
兵丁內派往照料酌給口糧以資食用奏入報

聞

壬申

定邊左副將軍阿睦爾撒納等疏奏集賽宰桑
齊巴漢等率衆來降

阿睦爾撒納等奏言四月初八日貝子策布登
扎布普爾普等文稱據協理台吉達什等領兵

至集賽見喀喇阿濟爾罕地方有人游牧即欲
擒罕有得木齊丹畢前來告稱我係都噶爾宰
桑屬下得木齊情願投誠已差人送信宰桑都
噶爾即來投誠初九日集賽宰桑齊巴漢迎於
途次告稱我游牧在額米爾河情願歸附前來
迎接我等五集賽共六宰桑我兄烏克圖原係
宰桑為達瓦齊拘禁今年二月將我補放宰桑
由伊犁放回游牧再宰桑達瓦僧克爾二人亦

為達瓦齊拘禁尚有舊宰桑策伯克達什策凌
杜爾把齊巴漢此三人內杜爾把齊巴漢現在
伊犁餘皆在游牧地方我聞大兵前來信息即
赴投誠未及送信與衆宰桑伊等居住地方俱
遠想一經聞信二三日內亦必前來投降我所
管之人一千餘戶五集賽原有一萬餘戶因屢
被哈薩克搶擄止餘七八千戶現今達瓦齊附
近游牧之人數年來因遇用兵牲畜虧損生計

艱難達瓦齊將一切事務俱交恩克博羅特吞
圖布袞布等辦理伊日在醉鄉屬下俱各離心
今年二月達瓦齊因征哈薩克令五集寨出兵
五千餘在察罕呼濟爾齊集預備衆人不從並
未前往又十數日前巴朗帶人三十餘戶至集
寨地方馬匹俱為我等所掠現今流落宰桑達
什策凌附近地方此外別無聞見臣等即將曉
示準噶爾

勅諭宣示齊巴漢不勝欣悅情願派兵効力臣等即
令帶兵五十名隨臣等前進臣等酌議五集賽
宰桑內齊巴漢已經投誠其達瓦齊欲調伊等
之兵又未應付觀此情形則其餘宰桑自必陸
續歸附今若即遣兵前往收服恐游牧人衆一
見大兵未免易生疑懼因令和托輝特副都統
敦多卜宰桑錫哈瑪往集賽地方收服衆宰桑
即從彼處派得木齊兵丁將巴朗擒拏并遣副

都統職銜達什敦多卜宰桑烏勒木濟前往招
降都噶爾再數日內宰桑達瓦屬下得木齊朋
楚克鄂勒椿巴圖杜爾巴齊巴漢屬下得木齊
納沁哈什哈等因伊等並無宰桑情願歸附陸
續前來懇請臣等已許其投誠並選兵一百六
十名令隨大兵前進又據將軍班第咨送自伊
犁前來之們都哈什哈告稱伊係臣阿睦爾撒
納之人自伊犁起程距今止十三日大兵進勦

達瓦齊尚未聞知日在醉鄉現欲往征哈薩克
集兵數千名於額貝淖爾地方令輝特台吉和
通額默根管領離此僅一日之程臣思和通額
默根現在額貝淖爾與否未可懸定莫若遣人
前往將臣投順以來得沾

大皇帝任用厚恩并現在帶兵前進情形告知和通
額默根諭令早降如不即歸順再行辦理又聞
達瓦齊遣宰桑恩克博羅特吞圖布二人往集

賽調取兵丁臣知二人俱係達瓦齊信用之人
若將二人擒獲達瓦齊情形俱可洞悉因派叅
贊大臣郡王班珠爾等帶兵三百名前往進攻
務期擒獲奏入

上諭軍機大臣曰阿睦爾撒納等奏稱集賽宰桑齊
巴漢率衆投誠即隨大軍前進並遣副都統敦多
卜前往集賽招降各處宰桑俾即派兵擒獲巴朗
又遣達什敦多卜招降宰桑都噶爾辦理俱合機

宜朕深為嘉予大功旦晚可望告成阿睦爾撒納等務當益加奮勉以副委任至齊巴漢冀沐朕恩親身迎接大兵甚屬可嘉著加恩授為散秩大臣並遣侍衛德善齋孔雀翎帽衣服荷包等物前往賞賜仍將大功告成後另加恩賞之處諭伊知悉再敦多卜達什敦多卜前往招降之集賽二宰桑及宰桑都噶爾並在伊犁之宰桑杜爾把齊巴漢一聞信息亦必陸續踴躍來降但俟奏聞後再頒

賞賜未免遲滯將此四人亦照齊巴漢俱授為散秩大臣各賞給孔雀翎帽衣服荷包等物俟伊等投誠前來即行賞給其台吉和通額默根為達瓦齊統領兵丁駐劄額貝淖爾地方阿睦爾撒納已遣人前往招降諒亦即來投誠但不知伊係何等台吉尚未奏明量給倭刀皮帽一頂數珠一盤亦交與德善齋往豫備賞給嗣後有似此等投誠台吉俱照此頒賞其應得職銜著阿睦爾撒納查明

伊等帶來戶口多寡分別具奏俟其赴熱河入覲時再行賞給阿睦爾撒納此次辦理可嘉著加恩賜與朕御用珍珠數珠一盤荷包鼻煙壺各一件色布騰巴爾珠爾青滾雜卜瑪木特阿蘭泰班珠爾訥默庫策布登扎布俱著賞給荷包鼻煙壺各一件以示獎勵

定北將軍班第疏奏噶勒雜特得木齊穆哈齊等率衆來降

先是班第等奏言據管轄聲援兵副都統扎爾
杭阿文稱三月二十六日卡倫兵根敦擒獲厄
魯特善巴訊係噶勒雜特之人現住綏勒噶圖
哈勒塔爾地方其噶勒雜特人衆俱向額林哈
畢爾噶遷去惟穆哈齋得秦六七十戶未知前
來投誠抑或向彼遷移因派公巴圖孟克帶兵
二百名前往收服二十七日又獲厄魯特沙喇
霍他訊係阿睦爾撒納之人告稱鄂隆古河地

方居住二得秦厄魯特人一百餘戶沙喇霍他
從中逃出途次遇見穆哈齊得秦人等向彼遷
移是以復派喀爾喀副都統多岳特帶兵一百
名前往協力招撫至是奏稱據巴圖孟克等於
四月初三日前往布圖爾托輝招降噶勒雜特
穆哈齊得秦時伊等俱各投順查得木齊穆哈
齊收楞額布喇特一得秦共一百二戶四百九
十五口此內阿睦爾撒納屬下吹扎布等六戶

三十五口內滿洲三人喀爾喀一戶當將得木齊穆哈齊交待衛薩扣送往軍營其收楞額布喇特即令管轄所屬又將穆哈齊等相近地方博克達屬人十七戶一併收服臣等因大兵前進路途已遠招服人衆無庸送至軍營即令在原游牧居住并飭後至兵丁勿令滋擾奏入

上諭軍機大臣曰班第奏噶勒雜特之得木齊穆哈齊等率衆投誠理應加恩賞賚但伊等俱係部落

屬下得木齊非台吉宰桑可比不必特遣人前往
著傳諭班第應酌量作何加恩賞賚之處即於軍
營所貯茶葉緞疋內重支賞給以示鼓勵

定北將軍班第疏奏烏梁海總管赤倫等回至
卡倫日期

班第奏言四月十一日接納米爾沙扎海卡倫
侍衛琛布里文稱從前遣往烏梁海總管赤倫
等六人於三月二十九日回至卡倫帶來察罕

薩喇什保等男女二十九人因馬匹疲乏止將
察罕及一僕人送至烏里雅蘇台軍營其餘人
口牲畜俱派人送至特斯鄂衣渾游牧又據巴
爾楚克卡倫侍衛桑古善等文稱四月初四日
派出巡查章京兵丁等將投降厄魯特三人帶
入卡倫訊係扎哈沁得木齊賽音伯勒克等共
男女九口係瑪木特屬下人賽音伯勒克之父
兄妻子俱在扎哈沁游牧地方當派兵丁照看

送往同居奏入報

聞

癸酉

諭駐劄烏里雅蘇台大臣莫爾渾等籌辦入

覲人等馬匹口糧事宜

上諭軍機大臣曰莫爾渾等奏稱現在支給各處官
兵馬匹口糧外尚餘騾馬牛隻計四千餘并羊五
萬隻擬送往屯田處交成袞扎布收放備用軍行

接濟馬匹口糧自當豫為籌備但現在裹帶之糧
已屬寬裕而成功為期甚速莫爾渾等並未計及
惟亟亟以接濟為辭此與永常節次所奏無異著
將朕訓示永常諭旨及薩喇爾等咨覆永常不必
接濟之摺一併抄寄莫爾渾等閱看現在運送係
騾馬牛羊尚非糧石可比姑照所請送交屯田處
收放此時阿睦爾撒納等應已奏功無須此項牲
隻接濟將此即留為前來入覲之噶爾藏多爾濟

等沿途支用甚屬有益著傳諭莫爾渾等遵朕前旨入於辦理入覲人等事宜內交與兆惠妥協辦理

命加恩賞賚輝特和碩游牧人等

上諭軍機大臣曰納穆扎爾奏輝特和碩特等游牧人衆牲口甚少復多病斃且去收成之時尚遙現在情形深堪軫念輝特之阿睦爾撒納和碩特之班珠爾自去歲率衆投誠朕屢次賞給口糧牲畜

以資接濟但伊等來時牲畜等項俱被中途搶掠
生計甚屬艱難且阿睦爾撒納等現在効力行陣
奮勉從事若加恩再賞給輝特和碩特人衆兩個
月口糧以示體卹即於軍營所貯米石內動支賞給
並傳諭阿睦爾撒納班珠爾等知之

五月乙亥

諭定北將軍班第慎密防範阿睦爾撒納

上諭軍機大臣曰班第奏阿睦爾撒納文稱前後隊

金方四月合言
卷十一
兵丁口糧未全裹帶或將牲畜易換或將煙茶銀
兩運解沿途自行交易阿睦爾撒納此言甚屬錯
謬兵丁口糧未全給領者原為伊等在途難於携
帶起見即陸續給領亦自有一定日期豈有原領
口糧尚未全帶反行續給之理又伊稱兩路兵會
合駐劄若不豫辦接續口糧似乎少費籌酌兩路
兵一經會合即當長驅直入又何庸駐劄守候伊
原奏四月十五日可抵博羅塔拉地方今已至十

七日尚駐劄集賽查伊屬下之人此事儘可於成
功後從容辦理何必亟亟查辦不過借查人為詞
逗留時日竟無迅速奏功之意況欲將伊查屬下
人遷移至博羅塔拉地方明係欲藉此時將伊屬
下人等豫為糾合俟抵伊犁後將盡攫其財物可
以就近竄逸逞其狡詐耳朕用人推心置腹何嫌
何疑如係無闕輕重之小過不妨置之度外似此
貪詐狡獪伎倆畢露豈能逃朕洞鑒班第須察其

心跡密加防範不得稍有疎虞再阿睦爾撒納文內又以養贍準噶爾窮人為言此事斷不可行朕另行降旨曉諭可將此密諭班第知之又

諭曰據班第奏阿睦爾撒納咨商大兵前至伊犁撫定彼處人衆看來窮困者必多其作何養贍之處須豫為籌辦此奏所見非是從前都爾伯特親王策凌輝特親王阿睦爾撒納等遠離游牧前來輸誠朕是以加恩賞賜養其屬下人衆今遣兵平定

準噶爾地方正為救伊等於水火令其安享太平
若論窮人內地外地各部落蒙古內何處無之博
施濟衆勢所不能伊等於歸順後一概妄冀養贍
無論萬里之遠運送口糧難以辦理且試問伊等
未歸順以前其所資以養贍者何在著即傳諭班
第阿睦爾撒納等俟大功告成後將實在窮困者
一一查明或於伊等富戶內令其兼養即欲更為
籌辦不過即以蒙古自養之道令其各籌生計若

必須一一辦理養贍斷不可行再阿睦爾撒納等雖不能照原奏日期於四月十五日抵博羅塔拉地方此時定已到彼會合直抵伊犁矣大功一成即遵朕屢次所降諭旨將在伊犁隨將軍大臣等駐劄兵丁酌量存留其撤回官兵即速陸續分起凱旋班第等公同妥協辦理

命扎薩克郡王得木楚克為喀爾喀車臣汗部落副

將軍

定北將軍班第奏言喀爾喀車臣汗部落副將
軍公格勒克巴木丕勒因遲悞軍營馬駝事務

奉

旨革去公爵仍留軍營効力贖罪其副將軍員缺請
旨補放奏入得

旨得木楚克著授為副將軍

丁丑

訓諭定西將軍永常及定北將軍班第等擒捕逃人

及籌辦新降人衆事宜

上諭軍機大臣曰據永常奏新降之布魯特等有三
百餘戶私自逃歸本處者此等逃人原非甚闊緊
要之事但永常既聞逃遁即應派索倫巴爾虎兵
丁悉力擒捕縱不能追回亦於事體無碍若所存
止係綠旗無用之兵則又不如暫停擒捕俟大功
告竣此等布魯特自當另行辦理乃永常並未籌
及追捕之事第向噶爾藏多爾濟來使前屢次詢

問應否需兵管束似此措詞真不諳事理之甚著
將永常奏摺抄寄班第等伊平定伊犁後即將此
項逃人另行查辦再永常奏新降之奇齊克巴斯
哈等生計艱窘有懇求接濟之意至烏蘭烏蘇等
處多有為賊盜者現在準噶爾部內大亂大兵到
彼甫經底定焉能保其必無竊盜之人俟綏戢安
定之後自當以次廓清至於窮困人口當薩喇爾
領兵經過時已經查明或令彼處富戶養贍或令

耕種自給斷無從內地運送口糧至彼分給之理
昨已降旨曉諭班第等酌量辦理此事亦非永常
所能籌辦仍著傳諭班第阿睦爾撒納薩喇爾等
遵朕前旨妥協經理

定西將軍永常等疏奏噶爾藏多爾濟遣人赴
京請

安日期

永常等奏言四月十九日噶爾藏多爾濟遣布

圖庫前來軍營告稱台吉噶爾藏多爾濟早欲
歸降因向多阻隔未得其便今大兵已到現在
追隨副將軍出兵効力先遣人進貂鼠三十一

張恭請

大皇帝聖安欽惟我

皇上德威遠播率土輸誠今副將軍薩喇爾方到噶
爾藏多爾濟游牧地方望風迎附効力行陣並
遣人遠來請

安誠心可嘉臣隨派侍衛舒隆阿護送布圖庫等四
人至京以遂其瞻仰之願奏入報

聞

戊寅

命賞定邊右副將軍薩喇爾

上諭軍機大臣曰據薩喇爾奏新降額林哈畢爾噶
等處台吉宰桑俱傾心歸順冀受恩澤惟察其情
形俱有不願封噶爾藏多爾濟為汗之意懇將此

旨暫行停止薩喇爾相機酌辦甚可嘉予著即傳諭玉保將朕所降封噶爾藏多爾濟為汗之旨不必宣諭薩喇爾自進兵以來諸事奮勉今又能詳察彼處衆人情形為此陳奏甚合機宜不特額林哈畢爾噶等處之台吉宰桑等情有不願倘準噶爾全部誤認以噶爾藏多爾濟代達瓦齊為汗輒轉傳播關係更大今暫行停止不即宣諭則衆人俱無猜疑於進兵事宜大有裨益薩喇爾著加恩

賞銀一千兩卽有此處遣人送至伊游收以示鼓

勵

己卯

定邊右副將軍薩喇爾等疏奏沿途偵探達瓦

齊情形

薩喇爾等奏言四月十三日哈丹地方之得木
齊烏勒斯等擒獲達瓦齊遣往哈丹阿巴噶斯
之錫伯克沁等十三人前來臣等詢問錫伯克

沁等據云達瓦齊尚在伊犁近年以來屢因派兵多事屬人甚為窮迫達瓦齊因額林哈畢爾噶等處竊掠滋擾遣伊等前往辦理於二月初旬自伊犁起程到哈丹地方始知額林哈畢爾噶等處台吉宰桑俱已各率所屬歸誠大兵一到附近達瓦齊之烏魯特克勒特及綽和爾等之鄂拓克亦必俱來歸降臣等向錫伯克沁等

將

聖王安撫準噶爾全部之旨並大兵一路無擾各部
落皆輸誠歸附之處剴切曉諭釋令伊等回巢
布告烏魯特克勒特綽和爾等部落俟此數鄂
拓克俱來歸順達瓦齊必更勢窮力竭無可容
身之地矣奏入報

聞

庚辰

定邊左副將軍阿睦爾撒納等疏奏招降都噶

爾及擒獲逃人孟克特穆爾

阿睦爾撒納等奏言前遣副都統職銜達什敦
多卜額魯特章京烏勒木濟招降噶勒雜特宰
桑都噶爾今烏勒木濟帶領都噶爾並擒獲隨
同巴朗同逃之孟克特木爾前來臣等詢得都
噶爾素有歸順之心為哈薩克錫喇所阻遷移
至集賽游牧邊界今伊兄達什敦多卜之壻烏
勒木濟前往傳諭

恩旨向化之心益深踴躍隨即前來投順並情願帶
一得木齊及兵六十名隨營効力臣即令其帶
兵同進又審詢得孟克特穆爾供上年巴朗逃
遁時逼我同行我之母弟並無同逃尚在游牧
居住後至奇蘭地方曾遣人告知庫克新瑪木
特令即擒拏巴朗伊並未給回信我遂與巴朗
分散往依都噶爾度日巴朗於彼處過額爾齊
斯依烏梁海宰桑圖布慎處度日今巴朗聞達

什敦多卜等前來遂棄其妻子步行逃去臣等
現派內大臣瑪木特喀爾喀貝勒那木扎爾車
蘇隆厄魯特貝勒剛多爾濟貝子德濟特等領
兵三百名星往追擒務獲其孟克特穆爾暫留
臣營俟擒獲巴朗時與擒獲之巴布爾等一并
解京奏入

上諭軍機大臣曰阿睦爾撒納等領兵抵五集賽招
降宰桑達什策凌都噶爾等并擒獲逃人孟克特

穆爾巴布爾葛蘇爾羅卜藏西喇卜等奏請俟擒獲已朗一并解送來京阿睦爾撒納等辦理甚合機宜但此時曾否到博羅塔拉摺內並未奏及惟於報封外填寫自博羅塔拉起程字樣相彼處地方頗大伊等或纔至邊界或到時尚未見薩喇爾是以未及聲明從前薩喇爾奏阿睦爾撒納約於二十一日可到此時想已經會合早抵伊犁捷音自可計日而待再貝子克什克公多爾濟車登等

帶侍衛台吉等往追達瓦齊所遣宰桑恩克博羅特吞圖布等乃於中途誤中恩克博羅特等之計至今遠颺如恩克博羅特果係換馬逃去豈有復寫字縛於馬鬃自言逃去甚速之理此不過欲緩我兵追趕耳使克什克等果能奮往直前必將恩克博羅特即行擒獲但其擒獲與否於事關係無甚緊要且恩克博羅特即已逃去亦必取道博羅塔拉始抵達瓦齊處則此時路經博羅塔拉或已

被薩喇爾擒獲亦未可定其巴朗孟克特穆爾係
首先脫逃之人情甚可惡著阿睦爾撒納即遣人
將巴朗擒獲同孟克特穆爾一併械送來京其餘
被脅同逃之人送往都爾伯特游牧處交與舒明
約束收管

定邊左副將軍阿睦爾撒納等疏奏率桑達什
策凌率衆來降

阿睦爾撒納等奏言前遣喀爾喀副都統敦多

卜厄魯特章京錫哈瑪前往鄂爾果楚克地方
招降五集賽宰桑策伯克達什策凌等至四月
十七日先據噶克布集賽宰桑達什策凌投降
前來臣等詢知伊等五集賽內共有噶克布伊
克胡喇勒拉布林推素隆杜爾把五鄂拓克內
惟噶克布集賽四千餘戶因人口衆多設二宰
桑分管即係達什策凌及策伯克二人其餘四
鄂拓克或千戶或不及千戶俱有宰桑一人二

月間伊克胡喇勒宰桑齊巴漢回至游牧傳達
瓦齊之言令五集賽派兵一千在察罕呼濟爾
齊集往征哈薩克因春季馬匹疲瘦並未出兵
今聞大兵前來誠心効順原派兵三百名前來
効力緣此時馬力俱弱未能全到其宰桑策伯
克亦隨後踵至臣等即令達什策凌隨大兵進
發奏入報

聞

辛巳

命賞賚投誠台吉和通額默根

上諭軍機大臣曰班第奏稱阿睦爾撒納遣策布登
扎布帶兵招服和通額默根宰桑鄂哲特所領兵
五百名俱已收降朕前於阿睦爾撒納俱奏時已
知其必來歸附是以遣侍衛德善將賞賜之物豫
行齎往今大兵甫到果即納款來降甚屬可嘉著
班第於德善到軍營時即將所齎賞和通額默根

之物傳旨頒賜其賞給品級之處俟伊來京入覲
時另降諭旨

諭定北將軍班第等遣人傳

旨曉諭哈薩克

上諭軍機大臣曰班第等奏稱烏遜呼濟爾察罕呼
濟爾等處係當哈薩克孔道現交塔爾瑪善扎爾
杭阿等同台吉克伯克宰桑衛徵等帶兵設立卡
倫以資防守倘哈薩克領兵來時一面具奏一面

令噶克布拉布林集賽會兵一處迎敵仍以禍福
曉諭哈薩克令其作速撤兵具見籌辦周密深合
機宜此時哈薩克料不能前來即使前來大約仍
係阿睦爾撒納之兄巴特瑪車凌一人而已從前
阿睦爾撒納曾遣人通信伊兄俟巴特瑪車凌一
到即可得彼處實在情形現在兩路大兵已經會
合膚功指日可成朕意此時正宜遣人往諭哈薩
克著班第阿睦爾撒納薩喇爾同選一人前往明

白曉諭告以近因準噶爾等擾亂多年互相殘殺
荼毒地方朕撫有天下以安輯羣生為心特發大
兵戡定準噶爾俾得休養生息不罹兵革之災共
享太平之福雖準噶爾素與爾哈薩克為讐經朕
平定以後已降旨嚴禁準噶爾等不得肆意妄行
劫奪哈薩克人衆爾哈薩克情願歸誠與否聽爾
自為惟須各守邊界不得妄行出境劫奪準噶爾
人等倘不謹遵諭旨必發大兵征勦毋貽後悔將

此旨繕就往諭哈薩克其應於何時遣人前往仍
相機辦理不必拘泥朕旨往諭後即將彼處情形
詳悉奏聞

定北將軍班第等疏奏派兵移駐齋爾烏遜呼
濟爾各地方事宜

班第等奏言副將軍阿睦爾撒納文稱現在收
服之塔木集賽約計戶口八千有餘伊等所居
游牧寬廣且係新附之衆賢愚莫辨若不駐兵

防守彈壓不免盜賊奸宄從中滋擾應將駐劄
察罕呼爾濟兵二千名移於齊爾烏遜呼濟爾
地方駐劄駐劄烏蘭淖爾兵一千名移於察罕
呼濟爾地方駐劄不特可以防範塔木集賽兼
可資附近調遣之用臣即知會扎爾杭阿等移
駐齊爾烏遜呼濟爾地方齊旺多爾濟等移駐
察罕呼濟爾地方展放卡倫以資防守至四月
二十一日臣至博羅塔拉地方所有新降塔本

集賽宰桑齊巴漢達什策凌巴桑等來見情願
各率兵効力奏入報

聞

定西將軍永常等疏奏額林沁多爾濟領兵進

發日期

永常等奏言副將軍薩喇爾文稱現在大兵已
至博羅塔拉距伊犁甚近達瓦齊尚未來降我
兵既已深入必須加意周防祈於二千索倫已

爾虎兵內揀選一千即今起程接應以壯軍威
臣等前接副將軍咨已令副都統額爾登額領
索倫兵一千前往接應今將總管畢里哀所領
索倫兵一千名於四月二十五日令額林沁多
爾濟同畢里哀率領起程前往接應其三隊之
索倫兵丁不日即至飭令加意喂養馬匹相機
進發奏入報

聞

壬午

定北將軍班第等疏奏喀什噶爾巴喇特和卓投誠効力情形

班第等奏言據散秩大臣哈丹帶喀什噶爾之巴喇特和卓前來投誠告稱我部落人等投降準噶爾已五十餘年我父昂咱里特在時為噶爾丹策零革去和卓交與阿巴噶斯鄂拓克看守我父亡後我與兄畢爾干至今尚被看守適

宰桑阿巴噶斯之弟哈丹回至游牧聞伊兄弟
投降

天朝回來調兵我兄弟二人亦願率兵効順仰邀
大皇帝之恩因選兵四十名與哈丹同來再我等原
係喀什噶爾之和卓侯伊犁平定後如荷

聖恩得回故土情願招服喀什噶爾葉爾羌各處人
衆同來歸順現在進兵四十人懇令即持伊等
旗纛前往臣阿睦爾撒納伏思伊犁回人甚多

若令巴喇特持伊等旗纛前行回衆益可望風
投附當即照伊所請給與奏入報

聞

命賞給新降台吉宰桑等職銜並

頒賜衣物有差

上諭軍機大臣曰班第等奏現在招降之和通額默
根係伊弟格勒克雅喇木丕勒二人迫令同來宰
桑鄂哲特集賽宰桑達什策凌策伯克巴桑因見

往擒巴朗之兵始來歸順俱非實心向化阿睦爾
撒納是以未將伊等帶往軍中亦不留在游牧處
令於附近地方暫居如此則既可暗中防範而後
來歸順者亦不至啟其疑懼之心其喀什噶爾之
巴喇特和卓現在帶往軍中俟功成後令其招降
葉爾羌各處人衆阿睦爾撒納用心周密動合機
宜深可嘉予著先賞銀三千兩遣人送往伊游牧
處今兩路兵已抵伊犁捷音一到當大加賞齋也

格勒克雅喇木丕勒著照賞和通額默根之例各
賜大小荷包倭刀皮帽一頂數珠一盤其給與職
銜之處俟入覲後再降諭旨鄂哲特係管領一千
餘戶之宰桑或給與散秩大臣或一等待衛之處
交班第等酌議給賞達什策凌策伯克巴桑俱著
授為散秩大臣喀什噶爾之巴喇特和卓一聞哈
丹來歸即率兵効順且情願往招喀什噶爾葉爾
羌人衆心甚可嘉巴喇特和卓並伊兄畢爾千俱

各賞大小荷包貂帽一頂數珠一盤巴喇特和車
俱與入覲人等同至熱河再給職銜庫圖齊訥爾
之宰桑索薩齋於們都哈什哈一到帶兵來歸將
達瓦齊所遣之綏綏鄂勒錐圖一并擒獻亦甚可
嘉並著授為散秩大臣賞給翎帽衣服著侍衛瑚
費圖馳驛送往仍將事定後再行施恩之處詳悉
曉諭伊等知之

定北將軍班第等疏奏會同西路大兵進勦達

瓦齊情形

班第等奏言臣等至博羅塔拉行文西路副將
軍薩喇爾會兵進勦今據文稱聞達瓦齊已往
察卜齊雅勒地方距波羅布爾噶蘇台道路甚
近若俟兩路會齊後始往察卜齊雅勒不免繞
道紆迴西路所領大兵現在輕騎徑往波羅布
爾噶蘇台山梁進發其北路將軍所領大兵即
從庫蘇木蘇克前進彼此互為聲援相機辦理

臣等隨於四月二十三日輕騎起程過庫克托
木前進額駙色布騰巴爾珠爾等亦進至博羅
塔拉現在會合一處併力進勦奏入報

聞

定北將軍班第等疏奏宰桑烏魯木等率眾來
降

班第等奏言額駙色布騰巴爾珠爾等領兵前
往阿勒坦特卜什地方招服人眾等獲厄魯特

庫綱一人稱係宰桑烏魯木之叔烏魯木因達
瓦齊調遣帶兵一百名往距哈薩克我情願歸
降並即遣人邀回烏魯木前來歸順隨據烏魯
木來營告稱我等早有歸附

天朝之心昨聞大兵信息即星夜領兵三十名前來
我等所屬有得木齊四人人人口四百餘戶四項
牲畜約計萬餘俱各誠心歸附又貝子策布登
等帶領官兵分起搜查阿爾台山梁等處於四

月二十七日在古爾班龜塔克地方遇副都統
察達克所屬烏梁海得木齊朝罕等屬人又於
烏蘭布拉克喀喇哈巴等處遇鄂爾楚克那木
達克等屬人及宰桑圖布慎所屬得木齊喀喇曼
集等屬人俱行收服並獲與巴朗同逃之曼集
等八戶人口共收服人衆二百餘戶人口一千
餘名奏入報

聞

癸未

命定西將軍永常運解軍營銀兩

上諭軍機大臣曰永常接到諭旨將立臺運米之處
停止奏請就近解銀一萬二千兩以八千兩交薩
喇爾處備買口糧牲畜留四千兩於烏魯木齊備
用永常從前奏請運米一事並未詳細籌度其事
之可行與否並有濟與否冒昧陳奏經朕屢次訓
飭伊始自知謬誤奏請停止此奏尚屬可行著照

所請辦理

平定準噶爾方略正編卷十一

欽定四庫全書

平定準噶爾方略正編卷之十二

乾隆二十年夏五月甲申

命賞賚投誠宰桑烏魯木並擒獲賊使之庫本

上諭軍機大臣曰班第奏宰桑烏魯木偕伊叔庫綳
帶領四百餘戶來降又宰桑庫本將達瓦齊差往
和通額默根使人巴朗察漢擒拏解送甚屬可嘉
達瓦齊向衆鄂拓克派兵令台吉諾爾布統領在

特里木哈達防守已遣侍衛鼐庫納等傳旨招降
看來大兵所至勢如破竹阿睦爾撒納等辦理甚
合機宜現在達瓦齊計窮力竭量必早已就擒諾
爾布僅帶兵數百名在特里木哈達無關緊要來
降固可即不來降亦更無可以逃匿之處矣所有
率屬投誠之宰桑烏魯木並拏獲賊使之宰桑庫
本著加恩授為散秩大臣加賜孔雀翎并賞衣帽
荷包由驛馳遞交與侍衛瑚費圖宣旨賞給其來

降之台吉宰桑等先將為首之人酌量賞賜其餘
未經查明伊等品級職分者俟將來熱河入覲後
當分別等差大加恩賞著班第阿睦爾撒納薩喇
爾等即行曉諭知之

定北將軍班第等疏奏擒獲巴朗察漢等訊問
達瓦齊情形

班第等奏言新降台吉和通額默根留住游牧
之宰桑庫本將達瓦齊所遣阿勒巴齊巴朗察

漢擒送前來訊據巴朗察漢供達瓦齊遣我至
和通額默根處調兵囑云噶爾藏多爾濟差人
告知現在薩喇爾領兵七萬由巴里坤前來和
通額默根毋庸往哈薩克進兵即在博羅塔拉
險要地方屯兵防守沿河下游安放卡倫偵探
信息為進戰退守之計其薩喇爾所遣之人未
至伊犁達瓦齊已移住特克斯是以未曾遇見
伊犁舊游牧人等俱各四散所存無幾前此達

瓦齊並未調兵今始傳檄各處令我諭宰桑丹
津瑪瑪什蘇拉濟爾噶爾於伊等三鄂拓克派
兵防守闐勒奇察罕烏蘇摩亥圖嶺等處其丹
津游牧處所有牲畜去年俱被哈薩克擄掠現
在兵力無多不過暫派百餘人在闐勒奇之東
察罕布木地方安設卡倫探信瞭望至噶爾藏
多爾濟遣往之人並非伊屬下頭目一係噶勒
雜特哈薩克錫喇之人一係布魯古特尼瑪之

人特係達瓦齊飾言噶爾藏多爾濟與伊一心彼此密通信息聊以安慰衆人之意臣等伏思巴朗察漢乃達瓦齊遣赴和通額默根處調兵之人其言不無狡飾嚴刑究詰矢口不移詳閱達瓦齊諭和通額默根之書亦與巴朗察漢所供無異至噶爾藏多爾濟現隨副將軍薩喇爾領兵同進達瓦齊揚言密遣通信明係設計離間臣等現將巴朗察漢嚴行看守再據宰桑索

薩賚擒獲達瓦齊所遣調兵之鄂勒錐圖前來
臣等細加詰訊據鄂勒錐圖供達瓦齊於三月
十三日自伊犁遣我向和通額默根等各鄂拓
克派出征哈薩克之兵令我監看起程有巴爾
達穆特鄂拓克波斯宰桑等各帶兵數百名陸
續起程此等兵丁俱係前往哈薩克並非豫為
迎距大兵之用我因在彼守候未到之兵適值
們都哈什哈信到遂為索薩賚鄂拓克之人擒

獲再達瓦齊惟知終日飲酒諸事不理宰桑等亦不和睦衆心離散牲畜疲瘦即有迎距之心實已進退無路難以自存臣等隨將鄂勒錐圖一併嚴行看守奏入報

聞

丙戌

諭定北將軍班第等平定伊犁籌辦駐兵事宜

上諭軍機大臣曰據薩喇爾等奏領兵已過博羅布

爾噶蘇台至登努勒台地方達瓦齊所屬並無人在彼防守其伊犁附近之台吉宰桑喇嘛等俱已遣人前往招降所辦機宜悉協不勝欣慰至所奏功成之後請停止伊犁駐兵一事薩喇爾等益因準噶爾近年以來生計窮蹙若多駐官兵恐不無勞費起見耳朕前此諭令駐兵原非欲令永遠戍守以現辦四衛喇特旗分佐領并五集賽各鄂拓克人等及哈薩克布魯特邊界一切事宜若不令

大臣駐劄無所統率遇有應行查辦之事僅交四
衛喇特各部落汗等辦理究屬未協且既駐大臣
不能不酌量駐兵數百名或一二百名以備差遣
至兵丁所需口糧或收取達瓦齊輜重什物或將
諸鄂拓克應納貢賦徵收支給俱已足資應用著
班第阿睦爾撒納薩喇爾等至伊犁時會同妥議
具奏如量度情形并一二百名之兵均可無庸籌
辦則但令大臣官員駐劄亦無不可不必拘泥朕

前旨

丁亥

命竒塔承襲都爾伯特班珠爾扎薩克貝子

上諭軍機大臣曰班珠爾自同策凌等來降時朕即
加恩封為貝子嗣因伊身故無子策凌等議將伊
近族額布根之弟竒塔為嗣著即准其承襲扎薩
克貝子所有班珠爾屬下人等即令竒塔管理

戊子

命賞賚喇嘛索諾木班珠爾

上諭軍機大臣曰據班第等奏西北兩路會兵於達瓦齊不及設備之時當徑渡伊犁河協力擒拏阿睦爾撒納薩喇爾等辦理深為允協達瓦齊若能去逆効順朕自當另有加恩之處今既潛身遠竄一經擒獲即當獻俘京師以彰國法且宰桑莽鼐久欲歸降前往特克斯時曾與伊得木齊先行商議今達瓦齊正往伊處或即為莽鼐擒獲亦未可

定朕當尅期佇望伊等捷音也再喇嘛索諾木班
珠爾已彼達瓦齊擒獲自行脫出又會人救出西
路被擒哨探人等深可嘉予但喇嘛不便給與官
職著班第阿睦爾撒納即行從優賞賚俟阿睦爾
撒納赴熱河時將伊帶領入覲再行加恩

諭將軍班第等籌辦編查新降人等旗分佐領事宜
上諭軍機大臣曰據薩喇爾等奏所有新降人等編
設旗分佐領若按戶逐一清查恐伊等未免驚疑

現議封四衛喇特為汗不若令其各將本部落台吉屬下人等戶口逐一開報即交與伊等承辦薩喇爾等所奏甚是辦理一切事務當持大體况撫綏新降人等尤宜善於部署無事張皇著傳諭班第阿睦爾撒納薩喇爾等至伊犁時所有清查戶口編設旗分佐領之處如係四衛喇特所屬台吉屬下人等即交四衛喇特大頭目等辦理其達瓦齊所屬應行另辦之衆鄂拓克人及回人等亦著

交各該管宰桑頭目辦理第令得其綱領大略即
其中稍有遺漏亦無甚關係勿使衆人妄生猜度
庶為允協

命授新降宰桑塔爾巴等為散秩大臣得木齊烏巴
什等為侍衛

班第等奏言四月二十六日有庫圖齊訥爾之
得木齊曼集烏巴什訥默里濟爾噶爾等四人
來降臣等詢據得木齊烏巴什告稱我庫圖齊

訥爾鄂拓克有五宰桑分管我等宰桑名克什木共有七百餘戶俱在尼楚滾地方居住宰桑克什木因達瓦齊派遣帶兵六十名往距哈薩克我見大兵已抵尼楚滾即向曼集訥默里濟爾噶爾錫喇巴圖爾和通瑪瑪什等六人計議同來投降達瓦齊前此並未調兵聞大兵將到始派兵防守博羅布爾噶蘇隘口雖經行文我等亦並未遵照派防又詢得善披領集賽之得

木齊蘇克都爾格齊哈什哈等告稱我等鄂拓
克係喇嘛達爾扎時新立共有六百餘戶半係
達什達瓦所屬半係羅卜藏策凌所屬我等今
有四百餘戶俱在齊老海居住我宰桑莽鼐帶
領二百餘戶前往特克斯曾告知我等大兵不
日將到我族弟阿巴噶斯已經投降準噶爾人
等自必將我擄掠今暫居特克斯爾等俟大兵
到時一面投降一面與我寄信隨即來投又詢

得古里特鄂拓克之得木齊和通喀喇博羅莽
鼐伊什特克咱瑪博勒等告稱我等屬人二百
餘戶原係羅卜藏策凌屬下達瓦齊將我等入
於古里特鄂拓克達瓦齊聞大兵前來遷往特
克斯我等即移居於此情願投降又臣等至尼
楚滾地方據阿勒闐沁鄂拓克宰桑塔爾巴帶
伊二子及五得木齊投誠前來臣等詢據塔爾
巴告稱我鄂拓克得木齊十人戶口七百有餘

現在濟爾哈朗河居住今俱願投誠

天朝臣等即恭奉

恩旨一一宣示應遣回者諭令回原游牧處居住應
派往効力者即帶領行走奏入

上諭軍機大臣曰據班第等奏阿勒闊沁鄂拓克宰
桑塔爾巴帶領伊二子及得木齊五員前來投誠
塔爾巴係達瓦齊所派出兵之人聞大兵已至冀
受朕恩即行投誠甚屬可嘉著施恩授為散秩大

臣庫圖齊訥爾宰桑克什木善披領集賽宰桑莽
鼎一聞信息旋即來降亦著授為散秩大臣至庫
圖齊納爾之得木齊烏巴什為衆人倡率投降非
其餘得木齊可比著授為二等侍衛其餘得木齊
曼集訥墨里濟爾噶爾錫喇巴圖爾和通瑪瑪什
善披領集賽得木齊蘇克都爾格齊哈什哈古里
特得木齊和通喀喇博羅莽鼎伊什特克咱瑪博
勒等俱著授為三等侍衛即賞給頂翎再道路遠

遠賞賚什物不能多齎俟大功告成時再遣人前往頒賜仍俟伊等至熱河入覲時另予施恩著將此曉諭伊等知之

已丑

諭定北將軍班第籌辦接濟兵丁口糧事宜

上諭軍機大臣曰兩路會兵追擒達瓦齊自可迅奏膚功而達瓦齊現往特克斯若更遠竄又需數日之期官兵所帶口糧大概俱已支給其中原可通

融辦理但從前永常不識事體數請運米軍營兵
丁均所稔聞日久未見支領不無懸望希冀情事
現在正係軍行緊要之時不得不為過慮班第身
任將軍西北兩路事同一體伊等辦給北路兵丁
口糧甚屬妥協可以毋庸籌及其西路兵丁倘實
在必需接濟或由備往茶葉銀兩內酌換口糧或
由北路帶往口糧牲畜內通融辦給班第務須悉
心籌辦不得稍分彼此若可毋庸接濟或薩喇爾

已自行辦理班第即不必代為籌辦將此傳諭伊等知之

命定邊右副將軍薩喇爾等查明新降人等請

旨加恩

上諭軍機大臣曰據薩喇爾等將陸續投降之台吉

宰桑得木齊戶口數目具奏呼爾璜台吉烏勒木

濟等傾心歸順甚屬可嘉應加恩賞給官職因道

遠不能詳知伊等品級著薩喇爾逐一查明如有

應行賞給散秩大臣等官者一面奏聞一面將朕
加恩之處先行曉諭其頂翎即由京發往仍俟大
兵凱旋時再行酌量賞賚再次投降人等內達
什達瓦屬下之人甚多達什達瓦有無子嗣著薩
喇爾一併查明奏聞

定邊右副將軍薩喇爾等疏奏西北兩路會兵
同渡伊犁日期

薩喇爾等奏言臣等於四月二十七日領兵至

登努勒台地方班第阿睦爾撒納等於二十八日領兵至尼楚滾地方兩路大兵駐劄相距二十里臣等商定一同進發北路兵由伊犁河之固勒扎渡口越推墨爾里克嶺前進西路兵由喀塔克渡口越扣們嶺前進如此既足以張我軍威而彼此聲息相通應援甚便由此直抵達瓦齊所居格登地方議定即於四月三十日起程奏入報

聞

辛卯

命定北將軍班第等將羅卜藏丹津巴朗孟克特穆爾等解京獻俘

上諭軍機大臣曰據班第奏擒獲羅卜藏丹津派侍衛台布等解送來京並據達什敦多卜轉報額伯津宰桑所屬得木齊諾爾布扎卜巴顏轄將逃人巴朗擒獲同從前擒獲之孟克特穆爾一併派員

解送前來羅卜藏丹津員恩悖叛逃往準噶爾偷
生三十餘年今兩路大兵直抵伊犁無路奔逃並
將投降潛逃之巴朗一併擒獲實足以彰國憲而
快人心著班第等令解送之侍衛等沿途悉心防
範仍派乾清門侍衛前往張家口俟羅卜藏丹津
等一到即速解京候朕擇日獻俘明正典刑其擒
獲巴朗之諾爾布扎下巴顏轄奮勉可嘉應從重
加恩但前此投降人內並未見有額伯津宰桑及

巴顏轄之名著班第查明如係新來投降者即照
投降宰桑之例宣旨授為散秩大臣並著賞給世
襲雲騎尉銀一百兩以示獎勵再副都統達什敦
多卜有無協力擒拿巴朗班第等亦即查明奏聞
候朕酌量加恩

命寬免策凌孟克之孫巴布勒罪

上諭軍機大臣曰前同巴朗潛逃策凌孟克之孫巴
布勒等現已一併擒獲上年貝勒策凌孟克及伊

子巴朗冀受朕恩前來歸順乃策凌孟克赴熱河
入覲時巴朗乘間脫逃不獨負朕厚恩抑且悖逆
其父情罪甚重國法難寬朕已降旨將伊解送來
京治罪但念策凌孟克誠心感戴在軍前奮勉行
走伊孫巴布勒或為巴朗所逼或與巴朗同謀俱
可置之不問總因加恩策凌孟克特予寬宥著薩
喇爾將此傳諭貝勒策凌孟克知之其巴布勒至
烏里雅蘇台時即著莫爾渾等遣人送至策凌孟

克游牧處居住

壬辰

以大兵平定伊犁捷奏

宣諭王大臣等

定邊左副將軍阿睦爾撒納等奏言臣等帶兵
自入準噶爾邊境以來遠近皆望風歸附迨至
伊犁沿途厄魯特回子喇嘛等有牽羊攜酒迎
叩馬前者有率其妻子額手道旁者臣等恭奉

聖主恩旨宣布曉諭所在人衆或稱準噶爾地方數
十年來兵革相尋羣遭塗炭達瓦齊自為台吉
荼毒所屬毀殘黃教衆人不但無以為生將立
見骨肉離散今

大皇帝撫育羣生遣兵拯救我等得以瞻仰

天日出於水火不勝歡忭臣等見道旁居人並未遷
徙耕牧如常且老幼婦女毫無驚懼前後隨行
踴躍鼓舞伏思

皇上籌畫萬全一一

洞鑒於事幾之先臣等仰承

指授得以迅速奏功實千古未有之事現今即渡伊

犁河北務擒達瓦齊俘獻奏入

上諭王大臣等曰定邊左副將軍阿睦爾撒納等奏
報大兵直抵伊犁準噶爾部衆人等載道歡迎現
已撫定賊巢達瓦齊遁竄游魂可計日就縛等語
準噶爾一事實我

皇祖聖祖仁皇帝

皇考世宗憲皇帝籌辦未竟之緒即朕御極以來亦屢
准其請安貿易初未有興師致討之成心邇年因
其篡奪相尋人心瓦解諸部台吉策凌策凌烏巴
什及阿睦爾撒納等叩關內附後先踵至其人皆
熟悉彼地情形洞曉軍務朕於熱河召見時伊等
皆深知感激朕恩以願効前驅為請是其勢有可
乘機不可失因籌及兩路興師之舉而人心狃於

久安在廷諸臣惟大學士傅恒與朕協心贊畫斷
在必行餘無不意存畏憚今日諸王大臣具在試
各自揣本心方創議伊始確然信為必當從事者
誰乎甚至如策楞舒赫德身肩其任而懦怯乖張
幾至債事經朕降旨治罪而無識之徒未必不曲
為致惜由今日觀之則此二人當治罪乎否乎夫
準噶爾一日不定則其部曲一日不安來歸之人
將日益衆非得其地何以處之蓋揆情度勢今昔

迥殊在

皇祖

皇考時適當其聲勢方張藩籬完固彼得恃遠逋誅未
及犁庭掃穴設處今日事機之會有不乘時決策
迅奏膚功者乎即朕籌辦之初亦未敢遽信大功
計日可就是以禡牙推轂之典概未舉行設或時
會稍有濡遲朕亦惟有自為引咎耳然究不肯以
畏難之見徇浮論而失機宜且近日滿洲陋習假

持重以文其退縮在朕前並不能據實陳奏一惟
退有後言此風實可寒心現在師行未及半載初
無血刃遺鏃之勞軍資諸費較前甫及十之一二
即喀爾喀部落亦並未以大兵經過稍有滋累而
所至耕牧不移壺漿夾路為亘古所未有試問前
此之鯁鯁過計謂為有損無益必不可行者今果
有所損乎果當行乎否乎

皇祖平定朔漠詩中即有力排衆議之語足見我朝

家法獨運乾剛主持振作羣臣惟當竭心協志共思奮發有為若一任因循不知其委靡頽弊流入何等矣故今雖值此捷奏頻仍遐荒底定而朕心初不以為喜惟有感戴

上蒼福佑

列祖貽庥與廷臣益加儆勗而已其身歷戎行諸臣調度合宜克成偉績應加懋賞用示酬庸阿睦爾撒納賞親王雙俸所屬護衛官員增添一倍并加賞

豹尾鎗四桿其子著加恩封為世子班第薩喇爾
俱著晉封一等公并賞四團龍補服金黃緜朝珠
瑪木特著晉封三等公仍賞二團龍補服雙眼孔
雀翎俱准其常時服帶以示優獎色布騰巴爾珠
爾著賞親王雙俸所屬護衛官員增添一倍扎拉
豐阿著晉封郡王策布登扎布普爾普俱著晉封
貝勒策凌著賞親王雙俸所屬護衛官員增添一
倍策凌烏巴什班珠爾訥默庫俱著晉封親王策

凌孟克著晉封郡王在事大臣官員兵丁著該將
軍等分別等第造冊送部議叙叅贊大臣達爾黨
阿阿蘭泰等一并交部議叙兩路管理臺站官員
亦著查明議叙大學士忠勇公傅恒著加恩再授
一等公爵以為力矯積習為國任事者勸軍機大
臣等并著交部議叙所有一切應行典禮大學士
會同各該衙門詳察具議以聞尋議大功告成所
有告祭

天

地

太廟

社稷

陵寢禮儀現在遵奉

諭旨敬謹辦理其凱旋筵宴

賞賚等事恭奉

諭旨駐蹕熱河舉行所有應行典禮敬稽舊典請詎

吉加上

皇太后徽號前一日

上詣

慈寧宮恭進奏書屆期

皇上率諸王貝勒文武大臣詣

慈寧宮加上

皇太后徽號恭進

冊寶宣表行慶賀禮

皇上陞

太和殿諸王大臣官員進

表行慶賀禮頌

詔天下所有慶賀及凱旋應用樂章交樂部大臣撰擬進

呈恭請

御製碑文勒石太學其大兵所過地方有應行勒石之處及伊犁地方應建豐碑並請

御製碑銘敬謹鐫石以昭

盛典並開館纂輯平定準噶爾方略昭示奕禩奏

入

上從之

命賞賚安設臺站各蒙古厄魯特人衆

上諭軍機大臣曰安設臺站之蒙古等自進兵以來

行走黽勉毫無貽悞深堪嘉予今大功已成應加

恩賞賚其厄魯特等俱係新降之人感戴朕恩實

心奮勉尤屬可嘉著加倍賞賚班第等即行分別查辦

諭叅贊大臣鄂容安

上諭軍機大臣曰準噶爾平定兩路將軍大臣等朕俱已加恩鄂容安在叅贊大臣任內奮勉行走亦應加恩但伊從前有準噶爾不宜辦理之議伊父鄂爾泰與大逆胡中藻師生交結伊兄鄂昌又與胡中藻附和黨同鄂容安明知其事不為陳奏有

負朕恩伊若不前往軍營原欲從重治罪今因此
次行走免其治罪即係朕恩著將此傳諭鄂容安
知之

定邊左副將軍阿睦爾撒納等疏奏宰桑博什
等率衆來降

阿睦爾撒納等奏言前遣侍衛鼐庫納協理台
吉沙克都爾扎卜等前往招降台吉諾爾布五
月初一日沙克都爾扎卜回稱領兵至津集里

克伯斯伯勒齊爾二處地方訪台吉諾爾布信
息知伊尚在巴什干沙爾干之伯勒齊爾地方
此處止有宰桑博什等率兵八百四十七名往
拒哈薩克隨將

聖主恩旨曉諭博什等舉手加額願率所帶兵丁歸
降又據哨探兵隊內貝子策布登扎布普爾普
等文稱四月二十八日至伊犁有佛寺喇嘛并
回人等二千餘戶看船人十戶貿易宰桑博爾

博等四十五戶來降臣等於五月初一日抵伊
犁河投降人衆陸續前來據克爾努特台吉敦
多布葉克明安台吉綽瑚鼐錫喇和通塔爾巴
哈沁之輝特台吉唐古忒等俱來歸誠各請派
兵隨營効力復據前往哈薩克台吉額林沁屬
下宰桑鄂勒錫魯稱台吉額林沁前往哈薩克
後我等百餘戶為達瓦齊擒拏分散今願派出
五十人步行効力又喀什噶爾賽音伊蘇卜伯

克告稱我原係喀什噶爾宰桑為達瓦齊革退
留住伊犁今願派兵二十名効力事定之日祈
遣使同往原游牧處將舊屬二萬餘戶攜帶來
降又伊犁貿易回人阿卜達莫米木十三宰桑
等告稱我等共二千餘戶自伊犁河南喀什至
伊犁河北察罕烏蘇等處地方居住俱係舊台
吉噶爾丹策零屬人因達瓦齊苛虐無厭今俱
窮困情願派兵三百名協力同擒達瓦齊又鄂

斯莫木伯克告稱我等鄂拓克共有七得秦人
丁五百餘戶聞大兵前來即欲率屬來降因為
達瓦齊分遣未能一時齊集今俱願歸降臣等
恭奉

皇上恩旨詳悉開示并將情願出兵効力之人帶往
軍前餘俱諭令耕種貿易各安生理奏入得
旨下部知之

癸巳

上諭大學士曰準噶爾用兵一事上年朕詣盛京恭

謁

祖陵時俱已虔誠默禱今仰邀

列祖福佑迅奏膚功荒服敕寧慶洽中外實我大清萬
年宗社無疆之庥理應告祭

三陵躬伸謝悃惟是東巡尚未逾歲不欲以清塵除道
重煩我幽岐父老

永陵著派皇子永璋

福陵著派皇子永琪

昭陵著派皇子永斌代行告祭今秋諸皇子隨侍熱河
即就近取道前往俾其周歷遼瀋仰思

祖宗肇興之烈禮成後并可於奉天行圍較獵用習武
事而昭

家法所有應行豫備事宜著該部行文各該衙門照例
豫備又

諭曰平定準噶爾捷聞此皆仰蒙

皇祖

皇考謨烈顯承

福貽宗社故得膚功迅奏荒服牧寧理應敬詣

橋山躬申告祭因今春甫經展謁而目下青苗彌望農

事方殷車駕所經恐滋踐踏然朕仰慰

先靈之意實切於衷告

廟之典宜躬詣行禮

孝陵著遣皇子永璋

景陵著遣皇子永琰

泰陵著遣皇子永琪前往代行告祭所有應行豫備事宜著各該衙門速行豫備

命優叙大學士忠勇公傅恒

上諭大學士曰大學士公傅恒以加賞公爵具摺奏辭情詞懇摯及召見之際又復面陳再四至於泣下並稱金川之役叨封公爵已為過分等語觀其不自滿假倍深兢惕信出至誠實將來可以永承

恩遇之道朕心轉為嘉慰應俯允所請用成厥志
所有平定金川及準噶爾奏捷兩次功績均著併
於現封忠勇公勅內以昭茂典仍於軍機大臣內
交該部從優加等議叙

命加班第薩喇爾瑪木特公爵名號

上諭大學士曰班第著封為誠勇公薩喇爾著封為
超勇公瑪木特著封為信勇公班第薩喇爾並著
賞戴寶石帽頂以示優獎

命協辦大學士達爾黨阿馳驛來京

上諭大學士曰達爾黨阿帶領索倫兵在哨探兵隊
內共奏膚功甚屬奮勉今大兵已平定伊犁伊亦
無應辦之事阿克敦現患目疾不能行走達爾黨
阿著協辦大學士即馳驛來京供職

命定北將軍班第等曉諭哈薩克事宜

上諭軍機大臣曰大兵平定伊犁所有應行入覲人
等著班第阿睦爾撒納薩喇爾即將派定人數若

于何時可到之處一面奏聞一面將應辦事宜交兆惠等妥協辦理再哈薩克處應遵照從前所降諭旨遣人前往其曉諭哈薩克阿布賚之旨應告以哈薩克先與準噶爾互相構釁當天朝進兵之時正達瓦齊與爾等交爭因大兵前進達瓦齊始將擄掠爾等之兵停止今準噶爾地方已經平定俱為臣僕凡前此戕害爾等之事自可永行禁止爾等如願歸誠必普加恩澤若欲自為部落亦祇

許靜守邊界毋得侵擾倘仍照前擄掠當發大兵
征討將此明白曉諭視伊等情形若何即行奏聞
再策妄阿喇布坦噶爾丹策零俱係準噶爾台吉
伊等現在如有子孫朕尚欲為加恩如竟無嗣續
深屬可憫著班第等查明策妄阿喇布坦噶爾丹
策零墳塋照蒙古禮致祭一次仍由該鄂拓克人
等內酌量派人永遠看守並歲行祭掃之禮將此
通行曉諭準噶爾人等知之

命撤回噶斯駐防兵丁


上諭軍機大臣曰從前青海郡王索諾木丹津奏請帶領游牧豫備兵丁前往噶斯駐劄防範朕已降旨允行今大兵已至伊犁撫定準噶爾全部叛賊羅卜藏丹津亦已擒獲噶斯地方毋庸駐兵防守著傳諭副都統德爾素傳旨曉諭索諾木丹津將兵丁即行撤回並將準噶爾平定之處通行曉諭衆扎薩克知之

定北將軍班第等疏奏籌辦運送軍糧事宜

班第等奏言據駐劄烏里雅蘇台大臣莫爾渾等文稱大兵成功凱旋軍糧在所必需擬將軍前餘剩駝隻內酌量揀撥數百隻馱載米石以資接濟或令在卡倫等候或竟運往軍營咨商臣等臣與阿睦爾撒納等酌議從前睦續所送馬馱牛羊等項運至屯田處交與親王成衮扎布以備支用殊屬妥協至米石一項路遠馱運

較難不若多運茶封並著帶銀數萬兩更為有益現在移飭遵行奏入報

聞



平定準噶爾方略正編卷十二